

محتاجة لك

ديوان شعر عامية

أمل البنا

الطبعة الأولى

2020م- 1442هـ

ديوان العرب

للنشر و التوزيع



عنوان الكتاب: محتاجة لك

اسم المؤلف: أمل البنا

التصنيف الأدبي: ديوان شعر عامية

رقم الإيداع: 2020 / 21745

الترقيم الدولي: 4 - 97 - 6830 - 977 - 978

التدقيق اللغوي: د. هبة ماردين

تصميم الغلاف: د. محمد وجيه

رقم الطبعة: الطبعة الأولى

التسويق الداخلي: د. محمد وجيه

المدير التنفيذي: د هبة ماردين

المدير العام: د. فادية محمد هندومة



دار ديوان العرب للنشر والتوزيع - مصر - بورسعيد

جوال: 00201211132879

البريد الإلكتروني: mohamedhamdy217217@gmail.com

حقوق الطبع والنشر لهذا المصنف محفوظة للمؤلف، ولا يجوز بأي صورة إعادة النشر الكلي أو الجزئي، أو نسخه أو تصويره أو ترجمته أو الاقتباس منه، أو تحويله رقمياً وإتاحته عبر شبكة الإنترنت، إلا بإذن كتابي مسبق من المؤلف أو الناشر.




محتاجة لك

ديوان شعر عامية

أمل البنا





إِهْدَاءٌ

إلى الرّوح النقية التي ارتقت إلى بارئها...

إلى التي تمنّت أنت تكحل عينيها بحروفي...

....."أمي".....

أهدي كلماتي إليك حيثما أنت.

أمل البنّا

تستاهل يا قلب جبان

وفاتت مدة محدودة
وأيام حلوة معدودة
وبعديها أهواتغير
ده طبعه غريب ويحير
عامل إيه كده وسلامات
وأخبارك مفيش حكايات
وضاعت لهفة البدايات
ده جه وقلّي محستكيش
بكل برود
هكون ليكي صديق مخلص

وأخ ودود
ولو مضايقة احكيبي
في وقت فراغ أكون موجود
وحتى الشات ده ليه أوقات
ولكي حدود
وأي كلام ف الماضي
يكون مرفوض
كلامه رصاص في
جسمي يصيب
يارب الصبر والقوة
لأول مرة أحسه غريب
ده مش ممكن يكون هو
ف قلبي إزاي سكنت حبيب

وتخفق نبضه من جوه
يا قلب رخيص تستاهل
ده لو جاهل كان هيحس
يصد فيك وترجعله
ويأمر أمر تخضعله
ويظلم مهما يظلم فيك
تعود من تاني تسمعله
كأنه روتين يا قلب حزين
عليه اتعودت
وأقول نبعد تقولي أموت
ياريتني بعدت
ده لو ماسك عليك ذلة
يا قلب ف جسدي كالعلة

يا قلب عبيط كما اللعبة

كان بيها بيتسلى

وجعنتي ليه يا قلب بحب

لا يعرف دين ولا ملة

أهو فاتك ذليل تعبان

وما نابك غير النسيان

تستاهل تستاهل

يا قلب جبان

متسألونيش

متسألونيش إيه نوع ارتباطك بيه
حبيبي ساعات أنا بحسه وأنه أول البدايات
ورغم البعد والمسافات بحسه
العيلة والأخوات
ولو فالغربة يتوجع
وجعه فقلبي يوجعني
وأتوجع فيسمعني
علاقتي بيه شيء ثاني
شيء رباني روحاني
بيربط بينا رغم البعد

وحضن أمان لأحزاني
ونبض لقلبي أنا اللي مات
فأحيا قلب أحياني
وكل ما فيا بيعافر
وبعده أبو لهب كافر
وأنا المؤمن وبتعذب
وهو بعيد ومسافر
لأنه مهم في حياتي
ومحور كل أوقاتي
وأحكي معاه في حكايتي
كلام فاضي مالوش معنى
مافيش طريق ييجمعنا
المعنى ف نبرة صوت بترويني

بتشفي حزني وجراحي

عامل إيه وأحوالك

وإيه مالك

ف نبرة صوتك الحلوة

أذنين مكتوم

تقولي الغربية ليها رسوم

أرد الغربية مش هتدوم

وارضّ يا سيدي بالمقسوم

مسيرك يوم راح ترتاح

يصبرني وأصبر فيه

ونضحك من كلام بعديه

ويوحشني أجيب صوره

وتسبقني دموع عيني

ملاحه شيء يديني

وأستني يكلمني

برغم البعد يفهمني

بلاقي معاه أنا نفسي

كلامه ليه علاج نفسي

وأقول معاه الي ف نفسي

أنا الي كنت مكتئبة

ولا تفرق معايا أيام

غيرني لحاجة تانية

بقيت بحسبها بالثانية

بقيت بضحك وأعيش أحلام

بقيت بفرح وبتذوق

لأول مرة بتذوق

وأحط الروج مع الكحلة
وأشوف نفسي كده أحلى
لأول مرة أنا أهتم
وأزيح عني غبار الهم
لأول مرة أشوفني اهم
وأخرج وحدي وأتفسح
وأسعد نفسي ف الرحلة
بقيت أحلى بقيت أحلى
بقيت أحسن بقيت اقوى
بقيت ع الصعب بستقوى
سيبوني أفرح بدون ما أخرج
متسألونيش
إيه نوع ارتباطك بيه

أنا معرفش غير أنه
نسمة جات تفرحني
وأنا فرحي يا دوب لحظات
سيبوني أفرح ولو كلمات
مفيش بيني وبينه حاجات
ده عن بعد يا دوب كلمات
حلوة بتجبر المخاطر
ولوليا أنا خاطر
متسألونيش
إيه نوع ارتباطك بيه
أنا معرفش غير أنه
حضن أمان ودفاني
عوض أيام وكفاني

عن حزني الي عدا وفات

وأنه نجاه وأنه حياه

برغم البعد والمسافات

تعال يا قلبي

يا قلب جبان إيه مالك
صحيح صعبان عليك حالك
صبحت مرايا مكسورة
هزيل وبتعكس الصورة
أقولك...
ده بشر يباع
جميل مظهر وحلو لسان
لكن خداع
يا قلب عنيد مترجعلوش
بلاش أوجاع

مشي وسابك ف عز الحب

مقالشي وداع...

تقول عشقه ف شراييني

يضخ حياة

ما تحرمينش منه حرام

أنا بهواه....

وجاي دلوقتي تترجى وتقول

ساعدني أنساه

وهات ترياق يشيل

سمه من الشرايين

أجيبه منين يا قلب حزين

أذاك ورماك

وبخ السم ف صمامك

وجاب الخوف وقاله اسكن

وقلت آمين

جزاء ليك تعيش ميت

بلا نبضات بلا صمامات

بلا شرايين

ترد العشق مش بيدي

بيطري ف دمي ووريدي

أنا تعبان فمتلومنيش

ساعدني أنساه وخذ بيدي

يا قلب ذليل سقاني الويل

لازم تسمع

ده شخص عليل وبعده دليل

كفاية ارجع

تعالَ يا قلبي يا مسكين
أحاول أعيد ف ترتيبك
وأطيب فيك جروح سكاكين
بتنزف وجد لحبيبك
ونصف منه أوردتك
وسيبو قبل ما يسبك
وارميه ضمن كراكيبك
ده كان مستحلي تعذيبك
علاجك بتره من جواك
وكوى الجرح بهداوة
مضاد حيوي وكام فيتامين
من نسيان وقساوة
هيشفي جرحك ده ف الحال

وآلامه هاتداوى
وقوله وداع يا حب العمر
دي كسرتي لعنة هتصيبك
الأعيبيك وتعذيبك ديون متشالة
ف بريدك
نتخلص يوم بيوم منك
شبابك كان أو شيبك
يا جرح العمر

حاولت أبعد

حاولت أبعد لقيت البعد سجاني

وعشماوي لاعدامي

يلف الحبل على قلبي يسكت

نبضه جوايا

فتاني رجعت لجل أعيش

فمتسبنيش

لأنك بيت أمان ليه

وأنا بردانة حنية

وليه الرفض ده ليه

وأنا اللي معاك مش هي

يكون ردك متسألنيش

ياريتك تسألني نفسك

برغم الرفض رجعالي

ورغم الذل ف عنيكي

معنديش شيء يواسيني

كانت ف حياتي من قبلك

حاولت أنساها أنا بيكي

ومقدرتش فمتحاولنيش

جتي جريح وطيبتك

ف دنيا رافضها حبيتك

ياريتني عميت ولا شفتك

ولا حنيت ياريتني قسيت

بجور اليأس بيك عديت

ولا حسيت

وسط المرسي كان قلبي

عليه ورسيت

غزلت الحب توب من نور

ونفسي نسيت

وزينته بلون الفرح وليه الجرح

ليا هديت

وليه الأظعمة جات قاضية

وجات منك يا أغلي الناس

ورغم الذل ليه راضية

ومن مُرك ساقيني الكاس

وليه يا القلب راضي الذل

وليه بمداس هواه تنداس

أنا هويتك وأنت هويتها

وترجع ليها وتسيبك

ومهما حبيبي راح تبعد

تلف الأيام وتجيبيك

رضيت بذلي وهواني

قبلتك يعني على عيبك

روح أرجعلها وسبيني

روح لهواك

تلف الدنيا وتنادي

وأتمنى أرد نداك

ها مَوّت قلبي أنا بإيدي

وكان نبضه يا سيدي

وهدفنا كل أحاسيسي

لو حنت ف يوم للقاك
هترجع ليا بدموعك
وهستحلي أنا خضوعك
وأتلذذ كمان بيبكاك
وحياة ذي والكسرة
وقلبي الي ما حب سواك
لا أرد الجرح ليك جرحين
سن بسن وعين بعين
عصرت القلب جفيته
وسبته حزين
بهاق حبك ملا جسمي
وشوا كل شيء فيا
بعرف نفسي من اسمي

لكن ملامحي مش هي
دي واحدة غريبة معرفهاش
قولي يا مرايتي مين دية
رميت نفسي ف جحر هلاك
رميت نفسي وبأيديا
يا جرح ف قلبي ساب عاهة
يا داء مزمن شبت أذاك
تكون جلادي وعائزني
أكون ازاي هواك ودواك

اتغيرت

زي الزهر رقيق كان قلبك

زي الزهر

كنت بتحلف إنك ليا

طول الدهر

كل ده راح كده واتغيرت

مسافة شهر

زهر طلعلك شوك يبجرح

وبقيت بحر

بعد إحساسي بأن أنا طير

وبطيرف سماك

بعد ما كنت الحب الغالي

الي أنا بهواك

اتغيرت لإنسان تاني

أنا مش فهماك

مهما تحاول ترجع تاني

هقولك لأ

مهما هيتعب قلبي ويضعف

ويزيد دق

أنا إنسانه وليا كرامة

وصاحبة حق

آخر كلمة أنا راح أقولها

إن هواك

أجمل حلم أنا عشته حقيقة



رغم قساک

لو دورت ف قلبي ما تلقى

حد سواک

أنت نسيت وأنا برضو هحاول

إني أنساک

أخويا

يا كسرة ضهري يا أخويا

بقولتك آه من وجعك

يا أحلى واحد ف الصورة

سبحان يا حبيبي من بدعك

إزاي ضعفت واستسلمت

وإزاي المرض خدعك

تقول الآه كما المنجل

يخش ف قلبي من جدره

وبدعي ربنا يشفيك

من مرضك ومن غدره

مفيش ف إيديه شيء غيره

دا حكم المولى وده قدره

فداك نفسي يا نور عيني

يا عمري كله يا أخويا

ومهما أيامي تغريني

منين ما تعوزوني تلاقيني

ومهما أبعد ترجعني

حرقة شوقي وحنيني

يا تاج فوق راسي يا حبيبي

يامتشال جوه ف قلبي

يا ستر لعيلتي ولعيبي

وسند لشبابي ولشبيبي

يا حضن أمان

يا ونس الدنيا والأيام
أنا تعبانة من تعبك
وشايفة الدنيا لون بهتان
ومخنوقة ومضايقه
ومش طايقه
ومن خوفي عليك ما بنام
فأنا برجوك يا قلب أختك
تقوم ع الحيل وتستجدع
بلاش دمعك يا ضي العين
أنا بيك الي بتشجع
بموت والله جوايا
وأنا بلاقيك بتتوجع
وليك مني وصية كمان

متهجرنيش وأنا ف قبري
تزورني وتحكي زي زمان
وتقرالي سور قرآن
عشان ف القبر وضلامه
ماليش غيرك أنت حضن أمان
فدعي ربنا يحميك
نبينا من زمزم يرويك
ده قال ربك ف قرآنه
سنشدد عضدك بأخيك
أخوك الكتف الي يقويك
أخوك سندك ف وقت الجرح
أخوك عزوة ف وقت الفرح
ولدروس الدنيا دي شرح

أخوك سورك أخوك شورك

ف وقت الدنيا ما تميل

وتديك ف العدا دورك

أخوك تجبيرة لكسورك

ومهما الخلق يدولك

أخوك بس الي هيعولك

فإياك يعني تتكبر

وتتلهي عنه بغرورك

ده لو توصل معاه رحمك

تلاقي بركه ف الأرزاق

وخلق كتير بيدعولك

محتاجة لك

محتاجة لك جوه ذاتي

وأنتَ روعي ونور حياتي

عنك أنتَ لازم أبعد

حيرتني دموع آهاتي

حبك أنتَ كان حقيقي

بس عنك لازم أبعد

قربي منك فيه هلاكي

بيننا حاجز ألف سد

والهوى عدى الحدود

شوك مصاحب كل ورد

والزمن ياريت يعود
يكتب الأحلام لفرض
بس دا حُكم النصيب
حب مات بدون وجود

أمك وأبوك

يا لي ناسي أمك وأبوك
الي ف عيونهم شالوك
داقو هم الدنيا كله
شربو مر سنين بذله
لجل ضحكة من شفايفك
كان أملهم يسعدوك
سهرو ياما الليل بطوله
محرومين لجل يصونوك
حس بيهم وبعنانهم
بكرة يمشو ويسبوك

أوعى تنسى الي عملته

يا ابني داين راح تدان

كل خطوة هتلاقيه

نظرة واحدة من رضاهم

فيها ألف صوت أمان

بكرة أولادك يردوا

كل أعمالك زمان

اسأل أنت بس عنهم

الولاد هيقلدوك

لو هتنسى برضو ينسو

أنهم حتى يزوروك

أوعى صوتك مرة يعلا

هما يعني ف إيه أذك

صوت ولادك يوم هيعلا

ييجي يوم ويقلدوك

ده الزمن دواري ولدي

أصلهم زمان شافوك

أوعى تخسر دعوة أمك

أو تهين شيبه أبوك

كل رزقك بين أيديهم

والحساب ف آخرتك

يبقى أمنك بكرة خوف

تعيش غريب ف دنيتك

والهموم تهزم عزيمتك

إلا لو كنت بار

نور دعاهم سكتك

بكرة تلعن الظروف

الي عنهم بعدتك

مين هيحض أو يططب

بعدهم مفيش حبيب

لو هتتوجع ف يوم

هما ليك أحسن طبيب

هما نورك هما ضلك

هما سندك والأمان

أوعى تنساهم يا ولدي

مهما شغلك الزمان

الحق إشبع من دفاهم

من لقاهم والحنان

روح وخذ بركه دعاهم

قبل ما يفضى المكان

بكرة يبجي اليوم وتسأل

متلاقيش غير الحيطان

أمي

حلوة يا أمي وتاج ع الرأس

حبك جوه ف قلبي أساس

مهما أديكى وأدلع فيكي

موش هوفيكي يا ست الناس

مهما الدنيا بتقسى عليه

مهما يكون جوايا هموم

جوه ف حضنك كله يهون

مهما الخوف حاول يملكني

بتحوطيني بقلب حنون

أسراري معاكي بخبيها

ومين غيرك للسر يصون
 تمسكي إيدي وتدفيها
 بشعر إني ملكت الكون
 مهما أكبر ف السن معاكي
 بلاقيني طفل صغنون
 وتصلي حبيبي وتدعيلي
 وتنوعي كده ف الدعوات
 تصغري ليا وأنا بكبرلك
 وتشاركيني ف بعض حاجات
 شبيهي يا أمي ف تقاطيع وشي
 واللي يشوفنا يقول أخوات
 يمكن صوتي بيعلى شويه
 واتعصب ساعيني ساعات

تجري عليا وتيجي تسمي
بوسة لإيدك بوسة لخدك
ربي يديمك نعمة يا أمي
مالكة القلب ومين بقا قدك
وأنتي الروح ولعيني النني
ربي يبارك ليكي ف عمرك
ربي يديمك نعمة يا أمي

كنت فكراك الملاك

كنت فاكراك الملاك

بس مطلعتش ملاك

أنت عاشق الامتلاك

حبك الفترة العصبية

عشت فيها أنا الكئيبة

ضعفي كان هو الضريبة

والغريبة الغريبة

شايفة صورتك ف المنام

ف الشوارع والزحام

وسط ضلمة أوف نور

جوه بيتناع الحيطان
ورغم إنك كنت ظالم
شايقة صورتك الملاك
عمري ما شفتك شيطان

أنا

أنا الشابة الي قلبي عجوز

وحبك قبل عجزه يجوز

لكنك بدري شيبته

ضميرك عنه غيبته

وخوف الدنيا وهبته

وذليته وعرفت تفوز

أنا الضحكة الي مش بتدوم

ودمعة تايهة محبوسة

ف جدران عين عروقها هموم

أنا الفرحة الي حالفة تصوم

أنا الضعف الي كان قوة
أنا الصبر الي مات مسموم
ومن غدرك ياما اتلوى
أنا اتشوهت من جوة
خسارة ف الندل العتاب
عملت فيها هيمنان بيحب
قلبي الصُغير ع إديك شاب
قلت الصديق أنا والأب
وطلعت ف الآخر كداب
ده ميكروب حبه سرطني
كيماوي هجره مش نافع
وقلبي عنه يسألني
وراية الاشتياق رافع

غرست الورد بإديا
ف قلب بور ما فرحني
حصدته شوك وجرحني
رويته بدمعي ولا شافع
وأموت من شوقي لعيونه
ولا قدرة أعيش دونه
ومين غيري الي هتصونه
وف عشقه أنا الدرودش
حقن العشق ف وريدي
وعلى هجره معودنيش
ولما عشقه اتمكن
مشي حتى مودعنيش
علمني حبه بالخطوة

ونسيانه معلمنيش
عشقته يا خلق وأذاني
طب أدعي عليه بأيه تاني
إلهي يبتليك بالعشق
تدوق ذلي وحرماني
وتنكوي كويه قلبي
يا كاسر قلبي يا أناني

يا طير

أنا الصبر اشتكى مني

من كتر ما صبرته

سهر يواسيني قمر

وبدمعي حيرته

حلف ينور ليا ليلي

اهتم أهملته

قال لي العوض ليكي أنا

وإني أنا أسرته

فضل يضحى لجل فرحي

عشقتني فكسرتة

لقلبي أنا وهب الحياة
وبجهلي أنا قتلته
ما هو أصلي كنت متغيبه
بالعشق متصابه
حبيت حبيبي محبنيش
أهل الهوا غلابه
حكايات قلوب ليها العجب
تتغنى بربابه
أهو قلبي ضحى فتكوى
فطبيعي اتباع بلاش
ولصاحب القلب الكفيف
رحل له يا عين مجاش
لا حس ولا صعب عليه

ولا سابو ف حاله عاش

حبونا ناس محسناش

ونحب ناس محبتناش

معادلة صعبة معقدة

أبدأ مافهمنهاش

هتضحى وتحب بضمير

لا بد من خذلك

على عرشك تكون ملك

يهديك قرار عزلك

توب العزة هيخعلك

والضعف يغزلك

هتلاقي جبروتك دموع

الحب هيذلك

تصعب على الناس أجمعين

وتتوه سنين سنين

وتعيش حزين

الحب ده أكبر كمين

اهرب ولا يذلك حينين

أنت اتخلقت بجناحين

ف ليه يا طير

تعيش سجين

ليه يا أما مبتريش

لأول مرة يا مايا

أشكيلك ومترديش

لأول مرة يا قوية

تقولي الآه ولا تخبيش

ده مهما كان يكون فيكي

نقول مالك تقولي مفيش

ويا دكتور ماها أمي

وليه رقدتها كدة طالت

وليه خست وملاحتها

الجميلة للعجز مالت

دانا أمي جمل حمال
وياما الحمول شالت
لا قالت يوم ده حمل تقيل
ولا بالحمل يوم مالت
ده رأي الطب ورأيي أنا
آخرها من شهرين لسنة
كريم ومبديل الأحوال
وآه يا كسرة قلبي أنا
ليه يا دكتور تقول هتموت
دخلت إزاي ف علم الغيب
لا هو الموت بقا بشروط
لا يا دكتور عليك العيب
أعمارنا بأيدي الله

لاهي بأمرض ولا بشيب

بالله يا دكتور تعذرني

أنا أصلي صبحت كئيب

أبوس إيدك يا موت يعني

تسييلي أمي شوية كمان

دي غلبانة وتعبانة بقاها زمان

سيبها لي أعوضها شقا الدنيا

مع الحرمان

ساحني يارب بستغفر

غياب أمي عملي جنان

هاتو الدكتور كمان مرة

يشوف الغالية تعبانة

يا جماعة البقاء لله

وادعو لها دي سمعانة
لا يا دكتور أكيد غلطان
دي هي بس نعسانة
قومي يا أما ضميني
حضنك وحشني يا حبيبة
عايزة أداري أنا ف حضنك
منيش قادرة بدونك أعيش
طالت رقدتك والله
وطالت يا حبيبتي الغيبة
وليه يا موت كده طيب
ليه بالحزن تأثرنا
وليه بتجينا تأذينا
وليه بدري بتكسرنا

بتاخذ أعز ما لنا
ومن حباينا تحرّنا
ولما أمي تموت يعني
مين يططبب ويطمن
ومين عليه يظمن
ومين أشكيله فيظمن
قلبي م العالم خايف
حنين ربنا وشايف
ومين يرقيني ويسمي
يواسيني يشيل همي
وبعد الأم مين هيحن
لا تقولي خالي ولا عمي
وآه يا أما آه يا أما

يا صبر يا هيبة يا الهمة

وآه يا أما آه يا أما

يا بيت يا أمان مع اللمة

وآه يا أما آه يا أما

يا حزن يا عيلة يا الضمة

نامي بأمان الله

سلام يا أما وألف سلام

هستناكي تزوريني وتحضنيني في المنام

مطوليش تاني الغيبة

لسه ما بينا كتير كلام

يا غافر الذنب اسمعني

فراق أمي قوي واجعني

صبرني برحماتك



واكرمها بجنتك

ويوم الدين بيها اجمعني

يوم الدين بيها اجمعني

مش هاسامحك

أنت ظالم ظلم بين
خنتني وخنت العهود
كنت جافي ومش حنين
فين كلامك والوعود
أيوة غبت وغصب عني
وأنت زيك زي عادتك
بالظنون ديماً ظالمني
كنت روجي ونور عيوني
ونجمة عايشة ف السما
بترسم الأحلام ورود

نسمة صافية تضميني
من عيون كل الوجود
عمري كله عشته ليك
والليالي الي ما بينا
ذكرى تشهد يوم عليك
صوت غيابك كان قاتلني
كنت بطلب الاهتمام
طيف مجبك يحتضني
أنت شخص كثير أناني
أنت جاني أنت ظالم
شخص موهوم بالأماني
بلاش تعيش دور البريء
وتحكي قصة المظلوم

منك أنت قلبي ياما
شال وشال من الهموم
مستحيل هرجع لحبك
بعدي عنك هو ذنبك
اكذب أنت وقول دي خاينة
ف كل لحظة وكل ثانية
مهما توعد ألف حب
قلبي رافض يوم يسامحك

شكّله إيه

ليه تخبي علينا ليه
قولي يلا شكّله إيه
قصدكم على ابن قلبي
اللي نور ليا دري
اللي جمع السعادة
خلاها ف حياتي عادة
وذوقها لي ف البوكيه
اللي خلاني أميرة
كل حاجة فيه جميلة
رغم عواطفنا البخيلة

هو نفسه تحسه عيلة
هو صفه وهو ونصيبه
صلوع النبي محمد
لجل عينكم ما تصيبه
يشبه البدر ف تمامه
أحلى منه شويتين
صوته ككروان يغني
يسعد الناي الحزين
يشبه الثلج ف بياضه
والحدود وردتين
ابتسامته الحلوة بحر
غرقوا فيها العاشقين
الحنان ف كلامه نيل

يروى كل العطشانين

الكلام يطلع يططب

ع الحيارى المساكين

العيون غزلاني تسحر

زي ما تقول فنجانين

خلطة من حب ودفا

تشفي قلب المجروحين

يعني هو قمر وكامل

نوره غطى البساتين

هو يبدأ بالكلام

واحنا بس نقول آمين

عشرة غالية من سنين

هيبة جامدة واحترام

حاجة من ريحة زمان

بس أمور حبيتين

وشه ف ملامحه القبول

أي هم معاه يزول

لو تهل طلعتة

الأمان قلبك يزور

وتقولولي اوصفيه

هو زيه تلاقوا فيه

يا سلاااااام

ده ملاك ع الأرض عايش

وصفه خلص الكلام

والله خلص الكلام

رداً على قصيدة الشاعر هشام الجخ

أيوة بغير

لا يا هشام مش حتة ماس
أنا إنسانة وليا إحساس
تشهد على أخلاقي الناس
مين قال هبقى مداس للناس
دانا صعيدية وأبويا صعيدي
رق الدنيا ف قلبي يا سيدي
ورضاك عني أكيد يوم عيدي
بس الفكرة
إحنا حدانا جوه صعيدنا

الغربة واخدة الرجالة
كل صعيدي لم هدومه
ويا همومه
راح يلحق رزقه ف عجاله
والست بتقعد هجاله
لا بتقعد عالية ولا كماله
راعية الولد وراعية الأرض
ومحافظة بقوة ع العرض
ومصلية الفرض بفرض
وقت الشده ووقت العلة
لوتحتاجني أشيل المجلة
جوه غطانا أنا أحصد غلة
ميهمكش كلام اتقال

ما يهزك ربح يا جبال

يا ما كتف الصعيدية

ده شال

أحمال وفوقها أحمال

لا شكينا ولا كتفنا مال

أنا عارفة إنك واثق فيا

بس أنا ليا طموح زييك

الرك على حُسن النية

اسمعي ربنا يهديك

واعرف إيه ليك ولا عليك

دي حياقي فيها أنت شريك

وما تكمل غير بيا وبيك

الرجالة عادي خلطتهم

جوه ف شغلي أنا مديرتهم
أنا ف بلاد الله سفيرتهم
وقت غيابهم أسد غيبتهم
غيرة الراجل نار ف مراحل
والصعيدية بمليون راجل
ثابتة وجودي وعارفة حدودي
والزينة لو وسط النار
قادرة تصون
والعفشة لو ميت ترباس
فاجرة تخون
وما بين النون والنون
عشرة تهون
القصد يا هشام م الآخر

المسألة مش مية ترباس

المسألة حب وإخلاص

وكلامك ع العين والراس

قولي إيه رأيك يا هشام

مش برضو أنا كلامي تمام

جفت صحف رفعت أقلام

جفت صحف رفعت أقلام

وسلام عليكم ألف سلام

محتويات الديوان

5	إهداء
6	تستاهل يا قلب جبان
10	متسألونيش
17	تعال يا قلبي
22	حاولت أبعد
28	اتغيرت
31	أخويا
36	محتاجة لك
38	أمك وأبوك
43	أمي
46	كنت فكراك الملاك
48	أنا
52	يا طير
56	ليه يا أما مبترديش
63	مش هاسامحك

66	شكله إليه
70	رداً على قصيدة الشاعر هشام الجخ أيوة بغير
75	محتويات الديوان

تم بحمد الله

محتاجة لك

ديوان شعر عامية

أمل البنا



الطبعة الأولى

1442 هـ - 2020 م

دار ديوان العرب للنشر والتوزيع

مصر - بورسعيد

جوال: 00201211132879

E-mail: mohamedhamdy217217@gmail.com